

# LATGALIŠU GAZETA

## Pīterdīna Rogovkā 2010

Kū vaira volūdu,  
tū lobuok! 

### 29. jūnī niu jau septeitu godu piec kuortys nūzarysynuoja tradicionālais Pīteram Jurceņam veļteitais pasuokums "Pīterdīna Rogovkā".

**Oskars Orlovs**  
Gostu, saceisim, nabeja ciš daudz, koč i Divs ar laiceņu piec pasaulā leitovom nabeja žaluojis. Tok ti vainuot var vineigi sevi. Saimineicys lūmā, kai irosts, beja nazkodejuo Naurānu pogosta prišsādātuoj, niu Rēzeknis nūvoda dūmis deputate Līvija Plavinska.

Pīminis breids Desetniku kopūs pi tautā meilātajam dzejnikam veļteituo pimineklā – ūzula kūkā taiseituo pošā P. Jurceņa stuova ar naatjemamū smaidu puor lyupom.

Tod vokora pusē bāzru bierzeitē nūtyka saviseigais pasuokums ar ailiniku (dzejnikū) i muzykantu daleibu. Itūgod Pīterdīna Rogovkā nūtyka uorpus telpom pi guņkura ar sīru i pi ols, ar sarunys piečuok vedēs drūsuok.

Pošu suokumu ivadēja Naurānu pogosta jauniši ar poštaiseitu muzykali teatralu uzvadumu "Žiguļa Sonāte". Piec juo vysi apsavīnuoja divejuos kūpeiguos dzismēs, kas, prūtamā lita, jau tradicionāli beja "Vuolyudzeite" (poša Pītera Jurceņa vuordi) i "Skaidruo volūda", kas Pīteram bejuse vīna nu meiluokūs. Taišni "Vuolyudzeitis" i muoksls kyns "Limuzins Juoņu nakts kruosā" deļ Pīters klīva par visim dzejis meilātuojam pazeistamū autoru.

Beja sabraukuši pošu latgališu ailiniki Anna Rancāne i Inta Nagla, kai arī juo laika bīdri Imants Lastovskis, Arnolds Auzēņš i cyti. Pasuokumā pīsadaleja arī P. Jurceņa lauluotuo draudzine Aina.

Taišni Reigys kungi i kuņdzis sataiseja nalelu puorsteigumu – pošā pasuokuma vydā sadūmova braukt pa celi

iz sātu. Tok tys jau puorejim nalidze tuoluok izbaudeit itū breineigū pasuokumu, varbyut taišni tod isasuoce sir-sneiguokuo i atkluotuokuo dīnys daļa. Smukai spīlejuoja Naurānu gitaristu ansamblis Ivara Rjabovska vadeibā.

Cytus godus Pīterdīna ir bejuse slavana ar jautrajom politiku uzastuošonom, tok itūreiz par politiku daudz natyka runuots. Stanislavs Škesters aktīvai dzi-duoja P. Jurceņa i cytu autoru dzismis, spēlādams gitaru, a Jurs Vīlums, zynoms arī kai Jureits, nūskaiteja puors sovys i cytu autoru ailis. Pa kaidam pantam izstuošteja i Raibis Suņs (Oskars Orlovs). Pošuos beiguos ar sovom dzismem prīcynuoja da-Gunchi (Guntis Rasims).

Paļdis tim, kas beja, a tim kas nabeja – sasatiksīm cytugod!



### "Latgalīts Latgalīšam Draugs" i pa leitu

22. jūnī Bukmuižā (Ezemikūs Dagdys nūvodā) nūtyka literari muzykals pasuokums "Latgalīts Latgalīšam Draugs" ci saeisynuotai La-La-Dra. Pīsadaleja muzykanti nu Daugovpiļs, Rēzeknis, kai arī nu Reigys.

Jau nazcik godu vysaiduos Latgolys vītuo i vysaidūs laikūs teik reikuoti pasuokumi "latgaliskā stilā", kab popularizeitu latgališu volūdu i jimā radeitūs muoksls dorbus. Tai 22. juņā vokorā Bukmuižā tyka sareikuots kuortejais "LaLaDra".

Koč i leits drusku

izjauce planus i daudzēji iprišk isarast sūlejūši muoksliniki sovu daleibu atsauce, stypruoki vysleidza isaroda: Anis Slobodžanins nu muzykys grupys "Dabasu Durovys", muzykanti nu grupys "New Buzz", grupa "Out of Horizon" gondreiz pynā sastuovā, taipat i modernuo folka jaunišu grupa "Dyrbyni" nu Daugovpiļs nūvoda, literats Oskars Orlovs (Raibais Suņs), sovys dzismes sadzidova i



Pīters Matuļs spēlej garmani 22.juņā pasuokumā LaLaDra

### Latgalīša pādi iz pasaulā

**Edeite Husare**  
Jūnī "Latgolys Studentu centrs" atkluoja jaunū tematiskūs pasuociņu sereju – sarunys ar latgališu pasaulā apceļotuojuj – "Latgalīša pādi pasauli". Pirmajā tematiskajā vokorā par sovū pīredzi, dzeivojūt uorpus Latvejis, pasadaleja divi LgSC bīdri Laura Putāne i Guntis Šmaukstelis.

Pirmū "Latgalīša pādi pasauli" vokoru kai "īsiļdeituoja" atkluoja Laura Putāne, kas sovā laikā vadiejuse Latgolys Radejis programū "Čaja vokors", a niu jau puora godus par sovū sātu sauc Vuocēju, kur struoduojuose kai breivpruteigais jaunišu centrā mozā piļsietēņā Nagoldā, a niu struodoj jaunišu organizacejā Štutgartē i ti arī dzeivoj. Laura vaira pastuošteja par sovū dorbu – jei organizē taidys kai dorba nūmet-

nis jaunišim nu vysa pasaulā: jauniši sabrauc kaidā piļsātā i, strodojūt nedeli ci vaira, padora kaidu lobu dorbu, pīvadumam, ikuortoj i sakūp piļsātys parku. Laura zynuoja saceit, ka Eiropā i cytur iz pasaulā itaidys nūmetnis jaunišim ir ciši popularys i itūgod vairuokys tikšūt organizēitys i Latvejā.

Ūtrs vokora stuostniks tyka gaideits ar eipašu napačiteibu: Guntis ir puorlicynuots Latvejis Universitatis "fizmats", aktīvs latgalīts, pasaulā ikaruotuojs, daudzim pazeistams kai Šmikucis. Jis ituo goda suokumā treis mie- nešus pavadeja breivpruteiguo dorbā Kazahstanā, kur školuoys vuiceja angļu volūdu, tok leidza pedagoga gaitom izbaudeja i Kazahstanys kulturnys i dobys koloritū byuteibu. Interesanta foto-stuosta veidā klauseituoji tyka



Guntis Šmaukstelis stuosta par pidzeivuojujūm Kazahstanā

ipazeistynuoti ar Kazahstanys sovpatēibom i juo pidzeivuojujūm arī tīpat sābru zemē – Tadžikistanā, kur Guntis devēs piec breivpruteiguo dorba beigū. Klauseituoji izzynuoja par Kazahstanys zīmu skorbūmu, cenom i dzeivis leimini, vītejim školānim i studentim, vaļsts dzeivis iskotim i biznesa "taseišonys" principim, kai arī Guntis lobpruot deve sovpatēigu Latvejis i Kazahstanys saleidzynuojujūm.

Piec obeju stuostu nūsa-

klusiešonys skaidrs ir vīns – aktīvs i darbeigs latgalīts napa-gais nīvinā pasaulā molā!

Tai kai LgSC bīdri puorsvorā ir aktīvi jauniši, kas regulari isasaista vysaidūs interesantūs pīdzeivuojujūmūs, brauc ekspedicejuos i apceļoj vysaidys tyvys i tuolejis zemis, ir dūmuots, ka stuostu vokori "Latgalīša pādi pasauli" klīus par tradiceju i ipazeistynuos ar daudzū cytu pasaulā valstu, kuruos bejuši latgališi, kulturnu sovpatēibom!

"Latgališu Gazetu" atbolsta Latgolys regiona atteisteibys agentura i Kulturkapitāla fonds.

